



*Sabtu, 17 Sptember 2022*  
**Ogen: 1 Petrus 1:18-19**



*Darah Mereka Keluh*



**H**ari palang merah Indonesia (PMI) situhuna enggo ibenaken tahun 1873 si bentuk pemerintahen Hindia Belanda. I bas proses kemerdekaan RI kedungenna guna ncidahken kedaulaten Negara Indonesia alu erbage tahap persiapan maka i bas tanggal 17 September 1945 ibentuk ras isahken kepengurusenna si iketuai Drs. M. Hatta janah jadi wari peringeten. Tentuna mbelin kal gunana PMI kemanusiaan bage pe nampati proses kebutuhan manusia guna nerusken kegeluhenna. Prinsip dasar pelayanen PMI e me: *kemanusiaan, kesamaan, kesukarelaan, kemandirian, kesatuan, kenetralan ras kesemestaan*. Adi si perdiateken i bas kegeluhenta apai ka i bas jaman digital ras media social, la sitik siidah ras sibegi pemindon darah guna nampati kalak si perlu tambah dareh. Terdauhen la sitik kalak si megati mereken darehna, alu donor darah guna nampati. Enterem kalak si sakit si perlu tambah dareh, itranspusi arah dareh pendonor, si megati lit si merekenca bage pe lit sindayakenca.

Renungenta paksa enda nuriken kerna kegeluhen manusia si la terjeng ndalani kegeluhen doni bagi si isurakenna. Tapi pe kuga nggeluh sentudu sura-sura Dibata, kegeluhen si mbaru i bas Kristus. Kristus enggo nebusi manusia alu darehNa, dareh si meherga si la tertukur alu duit, erta kebayaken ras kerina kemegahen doni enda. Bage me ergana dareh Kristus, la terjeng mereken kegeluhen man daging kula alu ngaloken transfusi dareh tapi dareh Kristus jadi jaminen kegeluhen si rasa lalap. Kegeluhen si la erguna erkiteken dosa, enggo isambari alu geluh si mbaru sentudu ras sura-sura si puna kegeluhen enda. Mehergalah si akap dareh bas daging kulanta sabap e tanda nggeluh si sehat janah meherga dareh Kristus sabap e tanda kiniteken si sehat.